



ATASSUT

UPA14/153-1

Knud Kristiansen

14.05.2014

Kalaallit Nunatsinni ilinniarfinni tamani ilinniartut pisariaqartitsineq naapertorlugu danskisut pikkorissarneqarnissamik periarfissinneqaqqullugit Ilinniartitaanermut Pilersaarutaat II-mut Naalackersuisunit qulakkeerneqaqqullugu Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Inatsisartuni Inuit Ataqatigiit sinnerlugit ilaasortaq Mimi Karlsen Inatsisartut aalajangiiffigisassaattut siunnersuutaannut imaattumik ATASSUT-mit oqaaseqassaagut:

Siullertut ATASSUT sinnerlugu Mimi Karlsen qutsavigissavarput soqutiginarluinnartumik siunertagissaartumillu siunnersuummik saqqummiussaqaarneranut.

ATASSUT-mit siunnersuuteqartoq isumaqatigaarput oqarmat: “Ilinniarusuttut matunik matoqqasunik naammattoorsissanngillat” – pissutsilli tassa ajoraluartumik taamaanngillat, taamaalitinneqarnissaali aaqqinneqartariaqarpoq, matumanilu siunnersuut manna ilaatigut aqqutissaalluarsinnaasut ilagivaat.

Assersuutitut taasinnaavarput kalaallit Danmark-imi ilinniariartut Kalaallit Illuinit neqeroorfigineqartarput studieteknik-imut aammalu danskisut pikkorissarnissanut peqataasinnaanermut, aammalu ilinniarfiit allamiunit ilinniarfiusartut aamma neqerooruteqartarlutik danskisut immikkut saniatigut atuartinneqarnissamik.

Taamaattumik siunnersuuteqartoq ATASSUT-mit isumaqatigilluinnarparput, pisariaqartoq ilinniartitaanermut pilersaarutip aappaanut danskisut oqaatsinik piginnaanngorsaaneq ilinniarfiit



iluini ingerlanneqartariaqartoq periarfissallu ilinniarfiup iluani killeqarpata ilinniarfiit assigiinngitsut suleqatigiinnerisigut ilinniarfiup avataani neqerooruteqartoqarsinnaasariaqarpoq.

Taamatutaaq aamma ATASSUT-mit isumaqarpugut ilinniartitaanermut pilersaarutip aappaata suliarineranut atatillugu ilinniarfinnut assigiinngitsunut piumasaqaatit nalilersorneqaqqissaartariaqartut, ilumut piumasaqaatit sulii naapertuunnersut aammalu pisariaqavinnersoq aaliangersimasumik qaffasissuseqarnissaat.

Taamaattumik ATASSUT-mit inassutigissavarput siunnersuutip matumap Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiitsitaliaani misissorniarneqarumaartoq nunatsinni pisariaqartitsinerup qanoq annertutiginera, aningaasatigut qanoq kinguneqassanersoq, tassanilu ATASSUT-mit neriuutigaarput aaqqiissutaagallaannartut inissinniarneqassanngitsoq aaliangersimasumilli ataavartussatut periarfissaalissasoq danskisut immaqalu aamma tuluttut immikkut piginnaanngorsaanissamut neqeroortoqartalersinnaaneq.

Taamatut siunnersuut saqqummiunneqartoq oqaaseqarfigalutigu, innersuusutigissavarput siunnersuutip akuersaartumik suliarineqarnissaa aammalu sulii aappasaaneerneqarnissaa sioqqullugu Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiitsitaliaanut sukumiisumik suliarineqarnissaa.